

Italieenske Sproake

Italienisk is heert tou ju romoanske Takke fon do Indoeuropäiske Sproaken. Dät is Amtssproake fon Italien, ju Swaits, ju Vatikoanstääd, San Marino un dän Souveränen Malteser-Orden. Juust so as aal do romoanske Sproaken stommet dät Italieenske fon dät Vulgär-Latienske ou, ju leete Uumgongssproake fon dät Latienske. Ju Standard-Sproake fon dät italieenske grundet sik ap dän toskanischen Dialekt fon ju Stääd Florenz (Firenze). Dät kumt fon groote florentienske Dichtere in't Middeloaler, so as Dante Alighieri (1265-1321), die besunners grooten Ienfloud hiede.



Een oold italieensk Woudebouk

Inhooldsferteeknis

Gjuchtskriewenge

Sproak-Biespil

Dät Uus Foar

Italieensk un sien Noaber-Sproaken

Wällen

Literatuur

Gjuchtskriewenge

Ju italieenske Gjuchtskriewenge speegelt dän Luudstound äänelk as ju spoanske of ju rumäänske gjucht niep wier, man dät rakt in't Italieenske neen truchgungende Känseekenge fon ju betoonde Sälwe.

Wäkke Seeken sunt daach tou beochtjen, uum een ferkierde Uutsproake of Skriewenge tou fermieden:

- Die Boukstäf **G** wäd foar tjuusterge Vokoale (a, o, u) as n gewöönelk [g] uutboald, man foar ljoachte Vokoale (i, e) as stämhoaft *dsch* (IPA: [tʃ]).
 - Biespil foar g + tjuustergen Vokoal: *il gorgonzola* (n speziellen Sies) määd [g]: [gorgon 'dzɔla].
 - Biespil foar g + ljoachten Vokoal: *il gennaio* (die Januoar) määd [tʃ]: [tʃen'najo].
- Uutnoamen rakt dät, man do wäide besunners känseekend: skäl een **G** foar aan ljoachten Vokoal as n [g] uutboald wäide, mout deer n **H** twiske. Skäl een **G** foar aan tjuustergen Vokoal as [tʃ] uutboald wäide, mout deer n **I** twiske.
 - Biespil foar gh + ljoachten Vokoal: *i spaghetti* määd [g].
 - Biespil foar gi + tjuustergen Vokoal: *il gioco* (dät Spil) määd [tʃ]: ['tʃɔko].

- Ju Bouksteeuwenfoulge **gl** klingt so äänelk as een [l], dät mäd n [j] fersmolten is, also een palatoal **L** [ʎ].
 - Biespil foar gl: *tagliare* (sniede) mäd [ʎ]: [taʎ'ʎare].
- Ju Bouksteeuwenfoulge **gn** klingt so äänelk as een [n], dät mäd n [j] fersmolten is, also een palatoal **N** [ɲ].
 - Biespil foar gn: *gnomo* (Gnoom) mäd [ɲ]: [ˈɲɔmo].^[1]
- Bie dän Boukstäf **C** is dät deelwiese so äänelk. Een **C** wäd foar tjuusterge Vokoale (a, o, u) as n [k] uutboald, man foar ljoachte Vokoale (e, i) as n stämloos *tsch* (IPA: [tʃ]).
 - Biespil foar c + tjuustergen Vokoal: *la corona* (ju Kroune) mäd [k]: [ko'rona].
 - Biespil foar c + ljoachten Vokoal: *il cinema* (dät Kino) mäd [tʃ]: [ˈtʃinema].
- Uutnoamen rakt dät bie **C** uk, man do mouten juust so uk kanteekend wäide: Wan n **C** foar n ljoachten Vokoal as [k] uutboald wäide skäl, mout deer n **H** twiske; skäl een **C** foar n tjuustergen Vokoal as n [tʃ] uutboald wäide, mout deer n **I** twiske:
 - Biespil foar ch + ljoachten Vokoal: *la chiesa* (ju Säärke) mäd [k]: [ˈkʲɛza].
 - Biespil foar ci + tjuustergen Vokoal: *la ciabatta* (1. die Huusskou, ju Slurre / 2. een speziell Wietbrood) mäd [tʃ]: [tʃaˈbatta]
- Ju Boukssteeuwenfoulge [sc] wäd foar tjuusterge Vokoale [sk] uutboald, man foar ljoachte Vokoale as n düütsk **sch** [ʃ].
 - Biespil foar sc + tjuustergen Vokoal: *il scandalo* (ju Skonde) mäd [sk]: [ˈskandalo]].
 - Biespil foar sc + ljoachten Vokoal: *la scimmia* (die Oape) mäd [ʃ]: [ˈʃim.mja].

Sproak-Biespil

Dät Uus Foar

Italieenske	Seelterske
Uursättenge, as	juUursättenge (in
in'e	kathoolskedüsse Foatenge
Liturgie bruukt wäd:	bloot foar düssen
	Artikkel ärstoald)

Padre nostro,
che sei nei cieli,
sia santificato il
tuo nome,
venga il tuo
regno,
sia fatta la tua
volontà, come in
cielo così in
terra.
Dacci oggi il
nostro pane

Uus Foar, die du
in dän Heemel
bäst
Din Noome skäl
hilliged wäide,
Dien Riek skäl
kuume,
Din Wille skäl
skjo, as in dän
Heemel, juust so
ap ju Äide.

quotidiano,
e rimetti a noi i
nostri debiti
come noi li
rimettiamo ai
nostri debitori,
e non ci indurre
in tentazione,
ma liberaci dal
male.
Amen.

Reek uus
däälich uus
deegelk Brood,
Un ferreek uus
uus Skäild,
So as wie
ferreeke uus
Skäildigere,
Un fiere uus nit
in Fersäikenge,
Man befräie uus
fon dät Kwoode.
Amen.

Italieensk un sien Noaber-Sproaken

Italieensk-sproakige Minnerhaide rakt dät truch Migratsjoon un Kolonioalismus allerweegense in ju Waareld, man do maaste lieuwje in Italien (mäd do bee litje Noaberlounde San Marino un Vatikoanstääd, un uk in dän italieensken (uurspröängelk lombardisken un rätoromoansken) Deel fon ju Swaits (dät is die Kanton Tessin un Deelee fon Graubünden).

Dät uurspröängelke Rebät fon ju Italieenske Sproake in dän äängeren Sin lait in ju Midde un dät Suude fon dät Italieenske Hoolichailound un ap Sizilien, uumdät een heele Riege fon romoanske Varietäten, do in Italien of ju romoanske Swaits boald wäide, as oaine Sproaken tou bekiekjen sunt. Dät Arpitoanske (of Franko-Provenzoalske), dät Oksitoanske, dät Rätoromaniske, dät Ladiniske un dät Furlaniske (of Friauliske) sunt seeker oaine Sproaken. Dät Sardiske, dät Korsiske, dät Venetiske un uk do Gallo-Italieenske Varietäten (Piemontesisk, Lombardisk, Ligurisk, Emilioansk-Romagnoolsk) in dät Noude wäide uk maastieds as oaine Sproaken bekieked. Gallo-Italieenske Sproak-Ailounde rakt dät uk in Suud-Italien, näamelk in ju Region Basilicata un ap Sizilien. Uk dät Sizilioanske wäd apgruunde fon sien oolde literariske Traditsjoon fon wäkke as oaine Sproake bekieked, man dät is wät striediger.

Nit-romoanske Sproaken sunt wäide uk in Italien, deelwiese as Sproak-Ailounde midde monken italieenske Dialekte, boald.

So wäide in't Noude düütske Dialekte boald. Dät sunt dan deelwiese baieriske Dialekte. Ieuwenske Suudtirol un n poor uur Rebätte loangs dät noudaastelke Skeed hääbe do baieriske Sproakailounde in dän Trentino besunnere Dialekte: Dät Zimbriske in Lusern is besunners ooldwaareldsk, un dät Fersendoaleriske (of Mocheniske, italieensk: Mócheno ätter "mochen" foar "moakje") heert uk noch tou do baieriske Dialekte. In dät Noudwääste, tichte bie dät Skeed tou dät Swaitser Wallis, wäide uk Walliser-Düütske Dialekte boald. Dät sunt neen baieriske Dialekte, man Alemanniske, nieper: Hoochstallemaniske. Do Walliser-Düütske



Sproaken un Dialekte in Italien

Sproak-Rebätte lääse oaber nit tichte bie dät italieenske Kääden-Rebät, man fuulmoor in Noaberskup tou dät Aostoanske, dän Arpitoansken Dialekt fon dät Aosta-Doal un uk wäil dät Piemontesiske un dät Lombardiske.

Loangs dät Skeed tou Slowenien wäd uk Slowenisk boald. Dät Resioanske, dät junner in dät Resia-Doal boald wäd, wäd maastieds as Slowenischen Dialekt bekieked, uk wan dät een oaine Literatur-Sproake uutbilged häd. Uurs ne slawiske Sproake is dät Molise-Slawiske, dät fon sowät 2500 Ljuude in tjo Täärpe fon ju italieenske Provinz Campobasso boald wäd. Dät heert tou dän Serbo-Kroatischen Komplex.

In dät Suude fon Italien sunt uk griechiske un Albaniske Sproak-Ailounde. Die Ursproang fon do Griechen in Kalabrien un Apulien is striedich. Wäkke kweede, dät kumt noch fon antike ooldgriechiske Kolonien, wäkke kweede, dät is aal man uut dät Middeloaler. Do Albaner in Italien sunt in moorere Befoukengs-Woogen fon dät leete Middeloaler bit in't oachtienste Jierhunnert ätter Italien keemen. Do Italo-Albaner baale - wan jo hiere oolde Sproake noch hääbe - maastieds aan Toskischen Dialekt. Ap do toskiske Dialekte foutet uk ju Albaniske Skrift-Sproake, man daach sunt do Italo-Albanere foar Albanere uut Albanien stuur tou ferstounden, uumdät ju Sproake uur do Jierhunnerde n oainen Wai nuumen häd.

Wällen

1. Berloco 2018, s. 111

Literatuur

- Berloco, Fabrizio (2018), *The Big Book of Italian Verbs: 900 Fully Conjugated Verbs in All Tenses. With IPA Transcription, 2nd Edition* (<https://books.google.it/books?id=DYynDwAAQBAJ&pg=PA3#v=onepage&q&f=false>), Lengu, ISBN 978-8894034813, <https://books.google.it/books?id=DYynDwAAQBAJ&pg=PA3#v=onepage&q&f=false>
 - Simone, Raffaele (2010), *Enciclopedia dell'italiano*, Treccani
 - Palermo, Massimo (2015), *Linguistica italiana*, Il Mulino, ISBN 978-8815258847
-

Fon "https://stq.wikipedia.org/w/index.php?title=Italieenske_Sproake&oldid=118662"

Disse Siede wuude toulääst annerd uum 08:10, 31. Oktober 2019.

Die Text is unner ju Lizenz „Creative Commons Attribution/Share-Alike“ ferföigboar; Bedingengen uurhoop konnen anweendboar weese. Eenpeldhaide sunt in do Nutsengsbedingengen beschriewen.

Ouroupstatistik